

Posjeta Banjoj Luci Davutoglu obilazio gradilište džamije Ferhadija

30/01/2011 12:19 by Administrator

Ministar vanjskih poslova Republike Turske Ahmet Davutoglu danas je u Banjoj Luci obilazio gradilište Ferhat-pašine džamije i razgovarao s banjalučkim muftijom Edhemom ef. Ćemilom o izgradnji ovog vjerskog objekta, čiju obnovu je pomogla Turska uprava za međunarodnu saradnju i razvoj (TIKA).

Muftija Ćemil je šefa turske diplomate upoznao s historijskim značajem Ferhadije, ali i onome što taj nekadašnji objekat pod zaštitom UNESCO-a predstavlja za sve vjernike u BiH.

Banjalučki muftija je ministru Davutoglu pokazao i nekadašnje dijelove džamije, koji su nakon rušenja, ratne 1993. godine, pronađeni u rijeci Vrbas.

Ćemil je naglasio da taj kamen nije uništen ni zemljotres, niti eksploziv, kojim je Ferhadija porušena.

"Ferhadiju danas gradimo od autentičnog materijala, od kojeg je bila i sazidana", podsjetio je banjalučki muftija tokom razgovora sa Davutogluom.

Turski šef diplomatije danas će se u Banjoj Luci sastati s predsjedavajućim Predsjedništva BiH Nebojom Radmanovićem i predsjednikom RS-a Miloradom Dodikom, nakon čega se očekuju i izjave za medije.

Ministar Davutoglu, koji boravi u posjeti BiH, prethodno je u Sarajevu razgovarao sa članom Predsjedništva BiH Bakirom Izetbegovićem te predstavnicima više političkih stranaka, a u večernjim satima boravit će u Mostaru.

Izvor vijesti: sarajevo-x.com